

Ayá...i Aki!

Ora nos ta pensa di rasismo, nos ta pensa di ayá...Sùit Afrika, Merka, Oropa, èts. Nos ta kòrda apartheid. Nos ta kòrda e polítiko hapones ku a bisa, “Ora bo duna man na un hende kompletamente pretu, bo ta sinti bo man ta bira pretu.” Nos ta kòrda antianonan na Hulanda ku ta tené abou pa motibu di koló òf mester enfrentá otro forma di diskriminashon. Nos ta kòrda ku hende di koló na Merka mester a sinta patras den konvoi.

Si, diskriminashon a base di koló ta un problema ayá. Ma lástimamente **rasismo no ta ayá so!** E no solamente ta bibu riba nos pid’i baranka...e tambe ta bon di salú! Awendia vários nashonalidat por sinti ku nan ta viktima di nos diskriminashon.

Nos tin tendensia pa generalisá, poniedo siertu hende den e mésun kategoria. Nos ta asosiá dominikananan ku prostitushon. Nos ta papia di yu di Kòrsou i sambèchi. Nos tin siertu imagen mental di haitiano, “makamba”, èts. Ma **ora nos ta generalisá, nos ta diskriminá.** Tin hopi dominikano desente ku ta duna aporte na nos komunidad. No tur yu di Kòrsou ta kamna ku sambèchi.

Nos tambe ta reashoná defensivo ora hende ta hinka tur boneriano den e mésun malchi. Nos no ta gusta ora un turista ta anunsia ku nunca mas e ke bishitá nos isla...pa motibu di 1 ladron. Un ta dañá pa otro. Ora nos ta generalisá, ta komo sifuera nos ta tira henter un saku di batata den barí di sushi pasobra un batata ta putrí. Nos mester distinguí entre e poko ku ta problemátiko i no klasifiká tur komo basura. Esei ta presis loke Beibel ta kondená ora e ta bisa “*no huzga*” (Mateo 7:1).

Ma esei no ta e úniko ehèmpel di diskriminashon i rasismo den nos komunidad! Straño ku por parse, nos ta diskriminá kontra nos mes, dunando e hulandes i merikano preferensia riba e yu di tera pa motibu di su koló i nashonalidat.

Maske nos ta mas tolerante di diferente koló ku otro pais, tòg nos ta diskriminá a base di koló. Nos a hinka den nos kabes ku koló kla ta mihó. Si un pareha tin dos yu, un koló kla i e otro koló mas skur, hopi biaha e mayornan ta duna preferensia na esun koló kla. Diskriminashon! Muchanan na skol kruelmente ta yama un mucha mas skur “djuku pretu”. Rasismo! Mucha muhénan ta preferá un yònkuman ku “bon” koló i e hoben tambe ta deseá un yùfrou mas kla ku e mes. Pakiko? Blachi no ta kai leu di palu. Mayornan ta siña yunan esaki ora nan ta enkurashá e yu pa buska un hende ku bon koló i bon kabei pa drecha status di nan famia. Lokura!

Di unda nos a haña e idea ku “bon” koló ta koló kla? No ta di Dios! Ta ken di ku “bon” kabei ta kabei las? Talbes nos Kreador a kiboká ora El a krea hende? Kisas un religion na nos islanan tabatin rason ora nan a siña ku hende a bira koló skur komo un kastigu di Dios? Nò! Dios a krea tantu hende pretu, komo esnan maron, kuli, kòrá, blanku, skur, kla. El a krea kabei las i kabei krin. “*Dios a mira tur loke El a traha, i ata, tur kos tabata masha bon*” (Génesis 1:31)! Nos Kreador no a kiboká!

Ma nos si kier sa ku Dios a bendishoná algun mas ku otro pa motibu di nan koló. E persona ku “bon” kabei i “bon” koló ta kier sa ku e ta mashá kos. Mentira! **Ningun hende por a selektá su rasa.** Ora nos ta trata hende a base di e aktitutnan aki, sea ta den famia, na skol, trabou, òf riba kaya, nos tambe ta kulpabel di diskriminashon i rasismo.

Un dia, un Dios hustu ku no konosé diskriminashon lo huzga nos tur. Na shelu lo tin hende di tur rasa, koló, i nashonalidat. Ningun hende ku “bon” kabei i “bon” koló ta garantisá entrada. Kualke persona por drecha, basta ku e realisá ku e ta un pekadó ku ta meresé kastigu eternu, ta bira lomba pa piká i ta konfia Kristo so pa skap’é di e kastigu ei. **No tin diskriminashon ayá. Mihó nos evit’é aki tambe.**